

Joanna Sodzawiczny

Keby niy ta ładowarka

Grajōm:

Synek

Cera

Muter

Fater

BINA I

Synek i Cera trefiajōm sie przed laubōm.

Cera: Michoł ? Ty tyż tukej?

Synek: Cześć, siostra, fater napisoł żebych przyszoł, to zech je... A ty co sam robisz?

Cera: Do mie napisoła muter, że chce ô czymś pogodać... Ciekawe co sie stało?

Synek: Pewnie psinco, ôjciec na pewno pościōngoł jakeś gierki i mobilniok se zapchoł...

Cera: Mōm nadzieja, że to nic poważnego... Coś mi niy pasuje, że ôroz my sie trefiyli.

Synek: Panikujesz, jak każdo baba...

Cera: Obyś mioł recht, ale mōm złe przecucia.

Synek: Co to godosz, dyć te nasze ôjce to sōm już stare ludzie, a starziki już gupot niy robiōm, zresztōm co ôni by mogli nawywijać?

Cera: Stare jak stare, jeszcze sie przekonōmy...

Synek: Jo ci padōm: nic sie niy dzieje... ale jak chcesz to sie mogymy wetnōnić. Jak sie coś podziolo to jo stawiōm ci Aperola, ale jak je w porzōndku, to ty stawiosz browara. Weta?

Cera: Niyh ci bydzie! Weta!

Synek: Ha! Browca zawsze z chynciōm wypija. Klupej!

BINA II

Fater: O, Michoł... Monika, ty tyż?

Synek: Chciołes żebych przyszoł... co tam ci trza, ôjciec?

Fater: No, bo w tym telefonie... No... musisz to yno ôbejrzyć...

Synek: (do Moniki) A niy godotech? Kludź, fater do izby i pokoż coś tam napochoł... kajś to właziōł?

Fater: Nikaj niy właziōłech, knefel mi czerwony migoł, toch go nacic i... cały mobilniok mi sie...

Synek: Fater, wiela razy mōm ci godać, że mosz naciskać na krzyżyk, a niy na migajōncy knefel?

Fater: Ciebie to tak leko godać, tego krzyżyka praje niy wydać, a knefel aż po ôczach dowo...

Synek: No, bo beztōż sie rozchodzi, żebyś przycis...

Fater: No i przycisłech...

Synek: No, ale przeca padōm: mosz niy przyciskać! Pokoż to yno...

Fater: Synek!... bo jo tak po prowdzie chcioł, żebyś sam przyszoł z inkszego powoda... Bo jo... jo chyba gupot narobiōł...

Synek: Mosz jako inkszo baba na boku?

Fater: Synek, czyś ty je miechym piźniony? Z jednōm babōm mōm utropa, a se byda drugo broł?

Synek: Żeby cie tak matka słyszała... To coś napochoł?

Fater: Ech, pojechali my w czwordek na ryby, matka jak zwykle nazbiyrała jakiś bambetli, klamorōw, taszōw, dyrdymałōw i inkszych firmatyntōw, a jo wziōn wyndki i zanynta. Cōż tyż mōm brać na ryby? Siedza se na stołku nad wodōm, szłapy se tonkōm we stowie, bo hica jak pierōn, matka leży na dece w ciyniu, kije już we wodzie, słońko świyci, ptozki furgajōm, chroboczki buczōm naôbkoło. No, je jak we raj. Matka tu mi brauzy przyniosła, tu kawka zrobiła, padōm ci: życ - niy umiyrać. A mie było tam aż tak dobrze, że chyba mi sie musiało oko zawrzyć, bo ôroz jak niy zaczęła larma robić... Wrzeszczała choby piźniynto. Tak zech sie wystraszył, zech aż podskoczył i wyndki poprzewraoł, a matka... Downo zech jōm takij niy widzioł. Koždy na nos patrzōł i kiwoł łebōm... Dej pokōj... Tako gańba...

Synek: A, niy przejmuj się... przyńdzie jij.

Fater: Niy ô to idzie... wiysz jako to gańba przed innymi wyndkorzami? Wyndki zech se sōm poprzewraoł!... Tak mie to znerwowało, że my sie powadzili! A ô co ji sie rozchodziło? A ô to, że niy wziyna ładowarki do telefona... I ôna pado, że to moja wina... Sama pozbiyrała masa roztomaństych bambetli, a mie pado, że to je moja wina, boch ładowarki niy wziōn? Niy mogła sama jōm spakować?

Synek: Wiysz jako jest matka, powajo, powajo i ji przyńdzie...

Fater: Przyńdzie, przyńdzie, zawsze przełazi... ale to niy ma nojgorsze....

BINA III

Cera: Co tam, mam, wszystko dobrze?

Muter: Pōdź, pōdź, cera, pōdź, se siednymy do kuchni.

Cera: Mam?! Stało sie coś?

Muter: Ciiii, jeszcze cie ôjciec usłyszysz...

Cera: Mamo, niy strosz mie, godej wartko co sie stało? Choro żeś je?

Muter: A kaj... ale gupot narobiłach...

Cera: Naciōgli cie na wnuczka?

Muter: A przestoń! Można żech je staro i gupio, ale niy aż tak!

Cera: No, to godej...

Muter: No to... A można naprzōd kawy ci zrobić?

Cera: Niy! Niy tera! Naprzōd powiydz ô co sie rozchodzi... abo wiysz co, zrōb, już je piyńć, za chwila bydzie za niyskoro...

Muter: Widzisz, jo tyż se zrobia, ale mało, boch je cało nerwowo... MICHOŁ!!!! chcesz kawy?

Synek: NIY, PIŁECH!

Cera: A ôjca sie niy pytosz?

Muter: Niy godōm z nim, niych se som zrobi... weż sie go spytej, czy chce?

Cera: FATER! A CIEBIE KAFYJU ZROBIĆ?

Fater: A JE BRONOTNY CUKER?

Muter kiwie gowōm, że niy.

Cera: NIY!!!

Fater: TO NIY CHCA!

Muter: Mōm brōnotny cuker, ale mu niy dom! Jezusiczku, co to je za chop, wrzōd, a niy chop.

Cera: A, to żeście sie powadzili...

Muter: A kaj, jo sie z nim wadzić niy byda, szkoda czasu, nerwōw i wszyskigo! No i tu je pies pogrzebany...

Cera: Muter, godej od poczōntku, co sie stało?

Muter: Ôd poczōntku padosz? To musza zaczōnić ôd tego, że pojechali my na dugi weekend na ryby...

Cera: No, wiym, mieliście przyjechać dziepiero jutro abo pojutrze... Co sie stało żeście sōm tak drap?

Muter: No, to suchej: pojechali my już we czworteck, jo jak zawsze pakuja: łachy, jedzynie, termosy, sznitki, ciepłe fuzekle, czyste batki, switry i co yno. A fater? Wyndka, angła, łopatka, waserflyje, to yno go interesi. No i siedzimy nad wodōm: fater na stołeczku, hica jak pierōn, szłapy we wodzie, kije moczy, piwsko ściepie, słońce grzeje, ptoki furgajōm, chrobajstwo buczy naôbkoło, słowym: horror. Co jo tam moga na tych rybach robić? Leża na dece. Ksiōnżka czytōm, abo jaki film na telefonie obejrza, abo audiobooka posuchōm, bo co tyż mōm robić w tyj dziczy? Mōm se dychnōnić, a tu co chwila yno: Rynia, a przyniesiesz brauza? Rynia, a kawki by my sie napili? No, napijmy sie

jak JO zrobia... Rynia, a jakij zisty tam niy mosz? I tak lang naôbkoło...

Cera: Muter, to na co ty z nim jeździsz na te ryby?

Muter: Bo kedyś było inakszyj, kedyś kije porozkłodoł i szli my do namiota na... no!... a potym tak jakoś sie utarło, no i jeżdza... Co, mōm mu tera padać, że mie sie tam mierznie? Mierznie! Mało pedziane. Jo niy ciyrpia jeździć z nim na ryby!

Cera: No, ale co było dalij?

Muter: Leża na tyj dece, ale telefon mi piko, że słabo bateria, no to ZAŚ stowōm, ida do przyczepy poszukać. Niy ma! W aucie niy ma, w taszach tyż niy ma, pytōm sie fatra: kaj ładowarka? A tyn niy odpowiadło, pytōm sie drugi roz, a tyn epny wyndkorz usnoł! Już mie ta ładowarka znerwowała, ale tyn ôjciec na stołku bōł taki pocieszny i chciałach go wystraszyć, podłaza bliżyj i wołōm mu do ucha: Lechu, kaj ładowarka?!... a tyn jak niy chupnoł, jak podskoczył, a jak sie ôbalił prosto na te wyndki. Wszystko poprzewrało, żyłki pometłoł, wszyscy sie naôbkoło na nos patrzōm, a ôjciec jak na mie z pyskiym niy wyjedzie. Powciepywoł wszystko do przyczepy i my przyjechali... I niy godōmy...

Cera: Niy przejmuj sie, mamó, przyńdzie mu...

Muter: Mu? Ônymu niy mo co przełazić, to jo je na niego wkurzono... ale... Niy to je nojgorsze...

BINA IV

Synek: No, suchōm cie, coś narobiōł? Kupiłeś se nowo wyndka?

Fater: Gorziz.

Synek: Co? Wymieniōł żeś cołki sprzynt na nowszy?

Fater: Gorziz.

Synek: Niy godej żeś se kupiōł łodka?

Fater: Co ci byda godoł... jeszcze gorziz... Wykupiōłech wyprawa na ryby do Norwegie...

Synek: No, ej, ôjciec, no to elegancko... Matka sie ucieszy na ta Norwegia, fiordy, zorza...

Fater: Źle mie rozumisz, synek, wykupiōłech yno jedne miejsce... yno dło mie. Samego...

Synek: A matka wiy?

Fater: Jeszcze niy...

Synek: OJĆ!

Fater: No właśnie...

Synek: Kedy jedziesz?

Fater: Piyrszego

Synek: A kedy powiysz matce?

Fater: A musza?

Synek: No, ej... jak?

Fater: A ty byś ji niy pedzioł? Piyrszego, jak pojada?

Synek: Chcesz, żeby to mie zabiła? Dyc sie wścieknie.

Fater: Ja, ale na ciebie...

Synek: A wiela cie niy bydzie?

Fater: Praje dwa tydzie.

Synek: To może ji wcale niy powiymy? Bydzie sie martwiła, ale jak przyjedziesz to sie ucieszy...

Fater: No, a potym zabije nos obu... To co zrobiymy?

Synek: My? Co TY ZROBISZ, chcioeś pedzieć. Twōj cyrk, twoje afy. Mie w to niy miyszej...

BINA V

Cera: Mamo, niy stosz mie, co sie stało? Z tych nerwōw żeś sie pochorowała?

Matka: Z tych nerwōw, to wzynach nalywka wiśniowo i niy wiym jak to sie stało, ale wypitach jōm cało, a potym...

Cera: ...ôbrzigałaś ôjca?

Matka: Keby... potym się ôblykłach i wylazłach i poszłach do...

Cera: Mamo, mosz kochanka?!

Muter: Dziołcha, wiyncyj powogi, doś że mie jedyn chop nerwuje, drugigo do kompletu mi niy potrza...

Cera: No, to do kogo poszłaś?

Muter: Niy do kogo, a kaj... do biura podrōzy i wykupitach wczas...

Cera: Uff, wczas! Ale mie wystraszyłaś, mogło być gorziz!

Muter: Je gorziz! Wykupitach rejs na Karaiby! Na dwa tydzie.

Cera: CO? Karaiby?! Super, mam, fater sie ucieszy!

Muter: No, niy wiym...

Cera: No, jak fater uwielbio take klimaty: morze, plaża i ryby cołkiym inksze, niż te u nos. Padōm ci: bydzie zachwycony, niy mosz sie co przejmować...

Muter: W tym synk, że wykupitach yno jedne miejsce... dlo mie... A fater jeszcze nic ô tym niy wiy...

Cera: O, kurcze...

Muter: No właśnie.

Cera: Ale możesz mu chyba dokupić plac...

Muter: No, chyba niy, bo były dwa ôstatnie, a jo potym zaro zadzwōniła do Aniele i ôna wzyna te ôstatnie...

Cera: ANIELA? Ty z niōm niy umisz strzimać weekyndu, a co dopiero dwōch tydni...

Muter: Wiysz co? Wola te dwa tydzie z Anielōm, niź choby godzina na rybach z twoim fatrym...

Cera: Hmmm... Ale Karaiby? Skōnd ci sie to wziyno?

Muter: Bo dali sie niy dało...

BINA VI

Synek: Mōm! Kup jij coś!

Fater: To je myśl... yno co? Nowy mikser!

Synek: Toś pojechał, ôna mikser, a ty na fiordy... już widza jejij mina... jak już, to byś musioł kupić chyba termomiksa...

Fater: To już mo, kafyjmaszyna tyż... Telewizor?

Synek: Niy! To by musiało być coś do nij, yno do nij... jake zauśniczki abo pieścionek?

Fater: Mo tego fol, a w tym niy łązi... niy wiym, czy bydzie z tego rada...

Synek: A co ôna by chciała? Co by sie ji podobało?

Fater: Durś yno godo, że niy mo czasu ksiōnżek czytać...

Synek: Te, i to je myśl...

Fater: Kupiymy ji ksiōnżki i zygor?

Synek: Niy, kup ji jake wakacje, abo jaki weekend we SPA, co by miała czas poleżeć i poczytać... dej yno twojigo laptopa, zaro co poszukōmy. Weekend we SPA... i co sam mōmy? O ciup, patrz wiela tu tego je... ôd Zakopanego do Bałtyku... co wybiyrosz?

Fater: Bałtyk fajny, ale daleko, a zaś do Zakopanego jechać... niy doś, że autobana rozkopano, to jeszcze sie na Zakopiance ciś... niy, szukej coś tukej...

Synek: Eee, ôjciec! Ty jedziesz do Norwegie, kup ji chociaź coś w inkszym wojewōdztwie...

Fater: Dobra, wpisuja R-A-D-O-M-sko... Ty, patrz jaki fajny pakiet: dwa noclegi we wygodnyj izbie, pakiet zabiegōw na pysk i ciało, niylimitowany dostymp do pakerhale i do luksusowyj strefy SPA, basyn solankowy, sauna... No, miodzio, niych sie wypoci, to i te muki przyńdōm...

Synek: Lakonium ze źrōdłym solanki, misa lodowo, natryski wrażeń i jaccuzzi... te, co to je te lakonium?

Fater: Niy wiym, ale niych mo... Stykać mie... Kupuj!

Synek: Kaj mosz aplikacjo do płacenio... Tukej, wbij PIN... To co, kupujymy?

Fater: Czekej yno. Pokoż to yno. Jaki je stan konta? Czekej, czekej, coś mi niy pasuje...

BINA VII

Muter: Ty niy mosz pojyncio jak jo by chciała pobyć sama w doma. Jo by chciała stanōńc z łōżka kedy chca, napić sie kafyju, legnōńc na szezlongu i poczytać abo poōglōndać seriale na Netlixie, te nojgorsze romansidła abo horrory.

Cera: Ale przeca ôjciec ci co rano kawa robi...

Muter: Jo ô tym godom... Robi. Dziynnje. O ôsmym! Punkt. Ani minuty pōźnij. Bez cukru i kapka mlyka. I to je dobre. Jo to lubia. I żeby niy było: jo to docyniōm, ale czy jo by roz w roku niy mogła stanōńc o dziewiōntyj i napić się bawarki? Czy jo moga se na wieczōr puścić Bridgertonōw i ôbejrzyć wszystkie odcinki od piyrszego do ôstatniego bez suchanio: "Czorno krōlowo Anglie, no miodzio! Tyn, co to wymyślōł, to je chyba gupi jak pōffōntek masła..."

Cera: Czyli chciałybyś być w doma sama na weekend?

Muter: No, ja!

Cera: To co za problem...? Wykup mu jako chopsko wyprawa na ryby i pošlij go samego.

Muter: A to take organizujōm? Idzie take kupić?

Cera: Niy wiym, dej yno laptopa, zaro sprawdzimy: M-Ę-S-K-I-E W-Y-P-R-A-W-Y, o, i mosz! W Polsce: Mazury, morze, rzeki, co chcesz?

Muter: W Polsce... A niy ma czego kańś dalij? Bo wiysz, jo na KARAIBY płyna... jo by mu wziyna cokolwiek, bele trocha dalij, bo wiysz, jo Karaiby, a ôn Dziko Przygoda nad Przemszōm we Sosnowcu...

Cera: Tego to sam akurat niy proponujōm, ale wiysz... brzmi zocnie. Szukōm. MOM! Wybieraj: Jezioro Bysjon – polowanie na metrowe cidry i szczuki, Norwegio – wyndkarstwo morske na wybrzeżu Helgeland, o, abo Olandia – łōsosie, trocie i szczuki na mucha i klasyczny spinning abo...

Muter: Niy gupiej, bier piyrsze z raji. Mie to je ganc egal, a ôn zowizoł bydzie rod. Weź to, zapłōc z konta, a umiałybyś to potym wydrukować? Wraża kartka do koperty i dom mu to jak mi rano kafyju robi, ucholkōm go tym, to można go szlag jasny niy trefi, jak sie ô tym rejsie dowiy. Tukej mosz PIN żeby przeloć...

Cera: Mamo... tyś godała, że kaj to jedziesz?

Muter: No, na Karaiby, palmy, Ocean, Słońce i jo. To je rejs szipym, a tam co wieczōr inkszy fajer: Bioły Bal, Kwiecisty Bal, a na kōńcu Bal Kapitański. My se z Anielōm wykupiły tyn pakiet ekstra...

Cera: Ja, ja, yno, mam, sam mosz zrobiony przelew na Wyprawa Do Norwegie...

Muter: CO?!!! Pokoż to yno!

W tym momyncie ze izby i ze kuchnie słyhać:

LECHU!!!

RENIA!!!